


Volontiranje je dobrovoljno djelovanje u interesu ljudi koje nije motivisano finansijskim interesom. Volontiranje podstiče aktivnu građansku ulogu za dobrobit zajednice, te podstiče razvoj ljudskih potencijala, poboljšava kvalitet življenja na načelima solidarnosti i podstiče samoorganizovanje ljudi u rješavanju problema. Volonteri i volonterke danas igraju važnu ulogu u dobrobiti i napretku razvijenih zemalja, zemalja u razvoju i unutar nacionalnih ili drugih programa za humanitarnu pomoć, tehničku saradnju i promociju ljudskih prava, mira i demokratije.

Volonterizam u Evropskoj uniji je različito uređen u svakoj državi članici. Prema istraživanjima EU, postoji razlika u procentu ljudi koji volontiraju na nivou Evropske unije. U zemljama poput Švedske volontira oko 40 posto stanovništva, dok je u zemljama poput Italije i Španije procenat ljudi uključenih u volontiranje manji od 10 posto. U okviru EU odobrena su 2 miliona eura za provedbu programa koji se odnose na volonterizam. Svaka zemlja može da kandiduje svoj program i da preporuke kako nabolje urediti ovu oblast.



Koristi od volontiranja imaju najviše ljudi kojima je potrebna pomoć u zajednici. S druge strane, ljudi koji volontiraju na taj način stiču nova iskustva, životna i radna. 2011. godina je proglašena za Evropsku godinu volonterizma. Ciljevi koje je Evropska komisija postavila da se ostvare u državama članicama, te regionalnim i lokalnim zajednicama i građanskom društvu su:

1. Izgradnja pozitivnog i poticajnog volonterškog okruženja u EU;
2. Jačanje volonterških organizacija i poboljšanje kvaliteta rada;
3. Vrednovanje i prepoznavanje volonterških aktivnosti;
4. Jačanju svijesti o vrijednosti i važnosti volonterškog rada.

Volonterizam je prilika koju mladi bez posla ne bi trebali propustiti jer će im volontiranje u kompanijama, nevladinim organizacijama i vladinim institucijama omogućiti sticanje znanja i iskustva te olakšati pronalaženje posla.

Lokalna zajednica je prvo mjesto u kojem treba tražiti volonterške prilike. Raspitajte se o lokalnim inicijativama i grupama, saznajte o problemima i projektima koji bi mogli imati koristi od vašeg entuzijazma. Saznajte koje organizacije djeluju u vašoj sredini i postoji li lokalni volonterški servis te kako možete pomoći pojedincima i organizacijama kojima je pomoć potrebna.

Volontiram.ba je web stranica mreže lokalnih volonterških servisa u BiH putem koje se možete informisati o projektima za koje su potrebni volonteri i o prilikama za volontiranje. Mreža lokalnih volonterških servisa BiH – Volontiram! osnovana je 2009. godine i okuplja sedam lokalnih volonterških servisa. UN Volunteers BiH je volonterški servis Ujedinjenih nacija koji djeluje u BiH i mjesto je na kojem se također možete informirati o prilikama za volontiranje (www.unv.ba). Mnoge nevladine organizacije, udruženja, savezi, kompanije, institucije nude prilike za volontiranje.

Evropska godina volonterizma 2011. je web stranica sa informacijama o volonterškim akcijama i aktuelnim dešavanjima širom Evrope (<http://www.eyv2011.eu>). World Volunteer Web je izvor informacija za volontiranje širom svijeta, može se koristiti za kampanje, zagovaranje i povezivanje, a uz to je i centralna tačka za obilježavanje 5. decembra, Međunarodnog dana volontera (www.worldvolunteerweb.org). Web stranica www.onlinevolunteering.org omogućava volonterima da se putem interneta angažuju u razvojnim aktivnostima i pružanju podrške lokalnim i međunarodnim NVO, vladama i UN agencijama.



Volonterizam u Bosni i Hercegovini

Volonterski pokret u BiH iz godine u godinu bilježi progres kako u organizaciji tako i u broju članova. Donedavno se vjerovalo da su volonteri mahom penzionisani građani, međutim sve veći broj mladih Bosanaca i Hercegovaca u armiji volontera pobija tu predrasudu.

Projekat „Socijalni dan“ Udruženja Infohouse

„Socijalni dan“ predstavlja jedan od projekata Udruženja Infohouse, čiji cilj je promocija ideje volonterskog rada među mladim ljudima i općenito. U projektu je učestvovalo više od 1.800 srednjoškolaca iz 53 grada u BiH. Učesnici su svoje dnevnicе ustupili Fondu iz kojeg će biti nagrađeni najbolji školski projekti.

Lokalni volonterski servis u Srebrenici

U Srebrenici djeluje Lokalni volonterski servis, kao dio mreže takvih servisa u BiH. Ove godine su obilježavali važne ekološke datume, a kroz razne promotivne akcije spremaju se i za proslavu 5. decembra, Međunarodnog dana volontera. Najveći trud uložili su u poboljšanje informisanja ruralnog stanovništva.

Izbor naj-volontera/ke godine u Tuzli

Povodom Međunarodnog dana volontera, 5. decembra, u Tuzli će se organizovati proglašavanje naj-volontera/ke godine. Volonteri će, ovim povodom, prikupljati slatkiše i igračke za djecu sa posebnim potrebama koje će im darovati za novogodišnje praznike, te posjetiti udruženja za osobe sa smetnjama u razvoju i organizovati art terapije koje će oni sami voditi.



Delegacija Evropske unije
u Bosni i Hercegovini

Skenderija 3a, 71 000 Sarajevo, BiH
Tel: +387 33 254 700
www.europa.ba



Evropska unija



Evropska unija



Evropska godina volontiranja 2011.

2011



Evropska godina volontiranja